

Cofnodion wedi'u Cadarnhau

Teitl y cyfarfod:	Cyfarfod Bwrdd CNC – Sesiwn Gyhoeddus Y rhai a oedd yn bresennol yn y cnawd yng Ngardd Fotaneg Genedlaethol Cymru, Sir Gâr, a thrwy Microsoft Teams
Dyddiad y cyfarfod:	26 Mai 2022
Aelodau'r Bwrdd a oedd yn Bresennol:	Syr David Henshaw (Cadeirydd) Clare Pillman, Prif Weithredwr Yr Athro Steve Ormerod, Dirprwy Gadeirydd (9:30-9:45 a 11:30 tan ddiwedd y cyfarfod) Karen Balmer Catherine Brown Julia Cherrett Geraint Davies Zoë Henderson Yr Athro Calvin Jones Mark McKenna Dr Rosie Plummer Yr Athro Peter Rigby
Aelodau o'r Tîm Gweithredol a oedd yn bresennol:	Jacqui Kedward, Pennaeth Archwilio Mewnol (dirprwyo ar ran Rachael Cunningham, Cyfarwyddwr Gweithredol Cyllid a Gwasanaethau Corfforaethol) Ceri Davies, Cyfarwyddwr Gweithredol Tystiolaeth, Polisi a Thrwyddedu (9:30-9:45 ac 11:30 tan ddiwedd y cyfarfod) Prys Davies, Cyfarwyddwr Gweithredol Strategaeth a Datblygu Corfforaethol Sarah Jennings, Cyfarwyddwr Gweithredol Cwsmeriaid, Cyfathrebu a Masnachol Gareth O'Shea, Cyfarwyddwr Gweithredol Gweithrediadau
Unigolion Ychwanegol a oedd yn Bresennol:	Clare Jones, Cynghorydd Arbenigol Arweiniol, Llywodraethu - Eitem 6 (Teams) Victoria Painter, Rheolwr Llywodraethu a Risg - Eitem 6 (Teams) Miriam Jones-Walters, Cynghorydd Arbenigol, Stiwardiaeth Tir - Eitem 7 Andrew Wright, Uwch Gynghorydd Arbenigol, Iechyd Planhigion a Throsglwyddo Gwybodaeth Ymchwil, Stiwardiaeth Tir - Eitem 7 (Teams) Ruth Jenkins, Pennaeth Rheoli Adnoddau Naturiol - Eitem 7 (Teams) Dominic Driver, Pennaeth Stiwardiaeth Tir - Eitem 7 (Teams) Elsie Grace; Pennaeth Datblygu Masnachol Cynaliadwy - Eitem 7 (Teams) Jeremy Parr, Pennaeth Rheoli Perygl Llifogydd a Digwyddiadau - Eitem 8 (yn y cnawd) Charlotte Morgan, Rheolwr Lles, Iechyd a Diogelwch - Eitem 9 (Teams)

Sylwedyddion CNC: Martyn P Evans, Pennaeth Gweithrediadau, De-orllewin Cymru
Kate Evans, Materion Cyhoeddus ac Ysgrifennydd Personol
Ben Dickinson, Rheolwr Newid Gwasanaeth a Ffurfweddiad
Sarah Williams, Pennaeth Strategaeth Gorfforaethol a Swyddfa Rheoli Rhaglenni
Annie Payne, Cynorthwydd i Bennaeth DPAS
Jack Tucker, Cymorth Gweinyddol a Chynorthwydd Personol Kickstart - Eitem 8 (i gyd drwy Teams)
Wyn Davies, Rheolwr, Rheoli Perygl Llifogydd a Digwyddiadau
Mark Pugh, Prif Gyngorydd, Grŵp Dadansoddi Perygl Llifogydd
Ross Akers, Rheolwr, Cynllunio Strategol a Buddsoddi mewn Perygl Llifogydd
Andrew Wall, Rheolwr, Gwasanaethau Perygl Llifogydd Cenedlaethol
Keith Ivens, Rheolwr Gweithrediadau, Rheoli Llifogydd a Dŵr
Tim England, Rheolwr Gweithrediadau, Rheoli Llifogydd a Dŵr
Dafydd Sidgwick, Cynghorydd Arbenigol Arweiniol, Cynllunio Strategol a Buddsoddi
Mike Evans, Pennaeth Gweithrediadau, Canol De Cymru
Lynette Bowley, Uwch Gyngorydd Arbenigol, y Cyfryngau

Sylwedyddion Cyhoeddus: Kim Waters – Undeb Afonydd Cymru
Steve Griffiths – Cymdeithas Saethu a Chadwraeth Prydain (BASC)
David Bean – Y Gynghrai Cefn Gwlad
Gareth Wardell
Nick Day
Susan Brown
Aelodau eraill o'r cyhoedd

Datganiadau: Yr Athro Steve Ormerod – Is-lywydd yr RSPB, Prifysgol Caerdydd, Cydbwyllgor Cadwraeth Natur (JNCC)
Dr Rosie Plummer – Bwrdd Awdurdod Parc Cenedlaethol Arfordir Sir Benfro, Ymddiriedolwr Plantlife
Geraint Davies – Game & Wildlife Conservation Trust, RSPB, Undeb Amaethwyr Cymru, Undeb Cenedlaethol Amaethwyr Cymru, yr Ymddiriedolaeth Genedlaethol; Tirfeddiannwr sydd â diddordeb yn y Rhaglen Adfer Mawndiroedd
Julia Cherrett – Cymdeithas Saethu a Chadwraeth Prydain
Karen Balmer – RSPB
Zoe Henderson – Y Gynghrai Cefn Gwlad, Game & Wildlife Conservation Trust
Yr Athro Calvin Jones – Aelod o'r Skyline Management Committee, Gweithiwr ym Mhrifysgol Caerdydd
Sarah Jennings – Ymddiriedolwr Gardd Fotaneg Genedlaethol Cymru

Ymddiheuriadau: Paul Griffiths
Rachael Cunningham, Cyfarwyddwr Gweithredol Cyllid a Gwasanaethau Corfforaethol
Colette Fletcher, Pennaeth Llywodraethu ac Ysgrifennydd y Bwrdd
Yr Athro Steve Ormerod (9:45 tan 11:30)
Ceri Davies (9:45 tan 11:30)

Ysgrifenyddiaeth: Jocelyn Benger

Eitem 1. Agor y Cyfarfod

1. Agorodd y Cadeirydd y Cyfarfod a chroesawu pawb. Gwnaed datganiadau o fuddiant ac ymddiheuriadau fel y nodwyd uchod.

Eitem 2. Adolygu'r Cofnodion a'r Cofnod Camau Gweithredu

2A. Adolygu Cofnodion Cyfarfod Cyhoeddus 24 Mawrth

2. Adolygwyd cofnodion cyfarfod mis Mawrth, a chytunwyd arnynt yn amodol ar wneud mân addasiad.

2B. Adolygu'r Cofnod Camau Gweithredu Cyhoeddus

3. Adolygwyd y cofnod gweithredu. Gofynnodd aelodau'r Bwrdd pam nad oedd unrhyw gamau'n deillio o'r eitem Diogelwch Coedwigaeth yng nghyfarfod y Bwrdd ym mis Mawrth. Rhoddodd y Cyfarwyddwr Gweithredol Gweithrediadau yr wybodaeth ddiweddaraf am waith parhaus ar y mater hwn. Cynhaliwyd cyfarfod dilynol gyda chyrff coedwigaeth eraill o bob rhan o'r DU a oedd â diddordeb yn null gweithredu CNC, ac roedd CNC wedi cael gwahoddiad i siarad yn un o ddigwyddiadau'r Awdurdod Gweithredol Iechyd a Diogelwch (HSE). Croesawyd y gwaith o ddatblygu camau gweithredu y gallai'r Bwrdd eu cefnogi, a byddai hyn yn rhan o'r camau nesaf.

CAM GWEITHREDU: Camau gweithredu o ganlyniad i'r gwaith parhaus ar Ddiogelwch Coedwigaeth i'w hadrodd i'r Bwrdd mewn cyfarfodydd yn y dyfodol.

4. Ystyriwyd materion yn codi a gofynnodd aelodau'r Bwrdd am yr wybodaeth ddiweddaraf am Benodiadau Cyfnod Penodol (FTA). Rhoddodd y Cyfarwyddwr Gweithredol Strategaeth a Datblygu Corfforaethol yr wybodaeth ddiweddaraf am y gwaith sy'n mynd rhagddo yn y maes hwn. Roedd papur wedi'i gyflwyno i'r Tîm Gweithredol (ET) ar gynigion i newid y dull o ymdrin â phenodiadau FTA, a fyddai'n creu cronfa dalent hyblyg, yn rheoli materion cadw ac yn lleihau'r ddibyniaeth ar swyddi FTA. Byddai arbenigedd allanol yn cael ei geisio ar y ffordd orau o reoli'r dull er mwyn sicrhau tegwch yn y tymor hwy. Disgrifiwyd y camau nesaf.

Eitem 3: Diweddariad gan y Cadeirydd

5. Rhoddwyd yr wybodaeth ddiweddaraf am drafodaethau parhaus gyda'r Gweinidog, yn enwedig ar yr agenda ansawdd dŵr. Roedd gwaith yn mynd rhagddo gyda Chadeiryddion Ofwat a'r cwmnïau dŵr i symud hyn ymlaen i grŵp rhanddeiliaid ehangach o dan arweinyddiaeth y Gweinidog a'r Prif Weinidog, gan fynd â hyn y tu hwnt i faterion gyda Gorlif Stormydd Cyfunol (CSOs). Byddai'r rhaglen ar gyfer camau gweithredu mewn perthynas â CSOs ar gael o fewn yr wythnosau nesaf ac roedd eisoes yn cael ei gweithredu. Roedd Ofwat a'r cwmnïau dŵr wedi cytuno i ddwyn gwariant cyfalaf ymlaen fel y bo'n briodol.

6. Bu'r digwyddiad diweddar yn y Senedd yn llwyddiannus ac roedd y cyfarfod rhanddeiliaid a gynhaliwyd ar y noson flaenorol wedi bod yn werthfawr iawn. Tynnwyd sylw at y symudiad allan o gyfyngiadau Covid a phwysigrwydd ailymgysylltu â rhanddeiliaid.
7. Roedd cyfarfodydd wedi'u cynnal gyda Gweinidogion ar Adferiad Gwyrdd a CNC.

Eitem 4: Adroddiad gan y Prif Weithredwr

8. Ystyriwyd bod y papur wedi'i ddarllen, a thynnwyd sylw at yr eitemau canlynol.
9. Roedd y digwyddiad diweddar yn y Senedd wedi bod yn gadarnhaol iawn, gyda phresenoldeb da.
10. Roedd aelodau staff yn arbrofi gyda gwahanol ffyrdd o weithio ac roedd timau'n dod at ei gilydd. Roedd ymweliadau safle'r Bwrdd wedi tynnu sylw at bwysigrwydd staff yn cysylltu yn y cnawd. Roedd y rhaglen Adfywio ar waith, gyda swyddfeydd yn dechrau agor, ac roedd y rheolau'n cael eu hadolygu.
11. Roedd rhaglen o ddigwyddiadau'n cael ei chynnal a fyddai'n hwyluso ailymgysylltu yn y cnawd. Roedd enghreifftiau'n cynnwys y Sioe Fawr, yr Eisteddfod, amryw o ddigwyddiadau i randdeiliaid, cyfarfod y Cyd-bwyllgor Cadwraeth Natur (JNCC) a Chynhadledd yr International Environmental Protection Agencies (EPA) ym Mharis.
12. Hwn oedd cyfarfod cyntaf y flwyddyn ariannol newydd. Byddai cyfarfod y Bwrdd ym mis Gorffennaf yn ystyried yr Adroddiad Blyneddol a'r Cyfrifon. Tynnwyd sylw at y gwaith o ddod â'r gyllideb o fewn 0.4% i'r targed. Bu cynnydd da o ran y mesurau perfformiad a byddai manylion yn cael eu darparu yn y cyfarfod nesaf.
13. Roedd CNC wedi bod yn gweithio'n agos gyda Chymdeithas Llywodraeth Leol Cymru (CLILC) i gyflwyno Memorandwm Cyd-ddealltwriaeth i feithrin y cysylltiadau ag awdurdodau lleol. Cynhaliwyd etholiadau Llywodraeth Leol Cymru yn ystod y cyfnod diwethaf a byddai'n bwysig ymgysylltu â'r cynghorau newydd. Disgrifiwyd y newidiadau ar lefel cyngor. Roedd arweinwyr yn cael eu cyhoeddi, a fyddai'n cyfrannu at CLILC.
14. Ystyriodd aelodau'r Bwrdd gynnwys yr adroddiad. Croesawyd rôl CNC o ran cydgyssylltu prosiect Natur am Byth a gofynnwyd am adroddiad ar gynnydd ar gyfer cyfarfod yn y dyfodol. Cytunwyd y dylid darparu diweddariad ar Natur am Byth a phrosiectau LIFE mewn cyfarfod yn y dyfodol.

CAM GWEITHREDU: Yr Ysgrifenyddiaeth i ychwanegu diweddariad ar brosiectau LIFE a Natur am Byth i'r Rhagolwg ar gyfer cyfarfod Bwrdd yn y dyfodol.

15. Estynnodd aelodau'r Bwrdd longyfarchiadau i'r tîm ar y gweithgarwch gorfodi llwyddiannus a chydabu'r ymdrech gyfunol sy'n gysylltiedig â hyn. Argymhellwyd y dylid cadw golwg ar yr ymdrech a'r costau llawn sy'n gysylltiedig â'r gwaith hwn. Tynnwyd sylw at effaith gweithgarwch gorfodi llwyddiannus.
16. Pwysleisiwyd pwysigrwydd gorfodi a monitro hyn ym maes ansawdd dŵr. Nodwyd bod hyn wedi'i godi mewn cyfarfodydd blaenorol a gofynnwyd i hyn gael ei gynnwys yn y broses adrodd reolaidd. Cydnabuwyd pryderon y cyhoedd ar y mater hwn ac awgrymwyd y gallai'r adroddiad fod wedi cynnwys rhagor o fanylion am y dull o ymdrin â'r risgiau a'r dibyniaethau a diagram rhaeadr o'r cynllun gweithredu, a fyddai'n galluogi CNC i fod yn fwy atebol a thryloyw. Oherwydd pwysigrwydd y mater ansawdd dŵr, cytunwyd y byddai'n bwysig cynnwys hyn fel eitem reolaidd mewn cyfarfodydd yn y dyfodol. Cadarnhaodd y Prif Weithredwr y byddai'n cael ei gynnwys fel mesur adrodd yn y Dangosfwrdd

Perfformiad a rhoddodd yr wybodaeth ddiweddaraf am y gwaith sy'n cael ei wneud yn fewnol ar y trefniadau sy'n ofynnol ar y mater hwn a chyda Llywodraeth Cymru ar y cyd-destun ehangach. Byddai'r wybodaeth ddiweddaraf am ansawdd dŵr yn cael ei rhoi i'r cyfarfod nesaf o ran llywodraethu, y camau gweithredu a'r amserlen.

CAM GWEITHREDU: Yr wybodaeth ddiweddaraf am ansawdd dŵr i'w darparu i gyfarfod nesaf y Bwrdd gan ganolbwyntio ar lywodraethu, y camau gweithredu a'r amserlen.

17. Nododd aelodau'r Bwrdd ymddeoliad Bob Vaughan, Rheolwr Tir Cynaliadwy, a gofynnwyd am i'w diolch a'u dymuniadau gorau gael eu mynegi iddo. Tynnwyd sylw at bwysigrwydd sbarduno newid amaethyddol mewn perthynas â'r amgylchedd ond cydnabuwyd y byddai'n anodd dod o hyd i rywun â'r un set benodol o sgiliau a gwybodaeth. Argymhellodd y Prif Weithredwr y dylid darparu adroddiad ar y dull o greu gwydnwch o fewn y tîm i gyfarfod nesaf y Pwyllgor Pobl a Thaliadau. Nodwyd bod trafodaethau'n mynd rhagddynt gyda Llywodraeth Cymru ar gyllid ar gyfer gorfodi'r rheoliadau amaethyddol.

Eitem 5: Adroddiadau Diweddarau'r Pwyllgorau

18. Cyflwynodd Catherine Brown, Cadeirydd y Pwyllgor Archwilio a Sicrwydd Risg (ARAC), yr wybodaeth ddiweddaraf i'r Bwrdd am y gwaith sydd wedi digwydd ers y cyfarfod diwethaf ar 10 Mawrth. Roedd y gwaith o gefnogi'r tîm i gynhyrchu'r cyfrifon terfynol yn parhau.
19. Cyflwynodd yr Athro Peter Rigby, Cadeirydd y Pwyllgor Cynghori ar Dystiolaeth (EAC), yr wybodaeth ddiweddaraf am y gwaith ers y cyfarfod a gynhaliwyd ar 18 Ionawr. Byddai'r cyfarfod nesaf yn cael ei gynnal ar 7 Mehefin, a hynny yn y cnawd am y tro cyntaf. Roedd recriwtio i'r Pwyllgor wedi bod yn digwydd i gynyddu'r gwydnwch a'r arbenigedd, ac roedd y pwyllgor EAC yn falch iawn o groesawu Dr Tom Nisbet o Forest Research a'r Athro Melanie Austen o Brifysgol Plymouth a fyddai'n dod ag arbenigedd mewn hydroleg coedwigoedd a'r môr yn y drefn honno.
20. Rhoddodd Syr David Henshaw, Cadeirydd y Pwyllgor Cyllid (FC), yr wybodaeth ddiweddaraf i'r Bwrdd am y cyfarfodydd a gynhaliwyd ar 14 a 28 Ebrill. Roedd y prif eitemau wedi'u cynnwys yn y papur. Byddai'r cyfarfod nesaf yn parhau â'r trafodaethau gwerth am arian ac eitemau'r dangosfwrdd perfformiad a godwyd yn sesiwn breifat y Bwrdd.
21. Rhoddodd Julia Cherrett, yn dirprwyo ar ran Cadeirydd y Pwyllgor Rheoli Perygl Llifogydd (FRMC), yr wybodaeth ddiweddaraf i'r Bwrdd am y cyfarfodydd a gynhaliwyd ar 7 Ebrill. Roedd y manylion wedi'u cynnwys yn y papur. Tynnwyd sylw at y ffaith bod y Rhaglen Weithredu ar gyfer Adolygu ac Adfer yn dilyn Llifogydd (FRRIP) wedi'i graddio'n Oren, gyda 32 o'r 51 o gamau gweithredu wedi'u cyflawni ar gyfer eleni, er y nodwyd nad oedd y rhai nad oeddent wedi'u cyflawni yn rhan o'r camau gweithredu hanfodol. Nid oedd gwariant cyfalaf ar gronfeydd dŵr wedi'i drafod a byddai hyn yn cael ei adolygu yng nghyfarfod nesaf yr FRMC. Rhoddodd y Prif Weithredwr wybodaeth i'r Bwrdd am sesiwn ymgysylltu dda a gynhaliwyd gyda thua 180 o aelodau staff er mwyn rhoi'r wybodaeth ddiweddaraf iddynt am y cynnydd a wnaed o ran y camau gweithredu ar yr FRRIP. Nodwyd bod cefnogaeth dda wedi bod i'r rotas, sef un o argymhellion yr FRRIP.
22. Rhoddodd Julia Cherrett, Cadeirydd y Pwyllgor Pobl a Thaliadau (PaRC), yr wybodaeth ddiweddaraf i'r Bwrdd am y gwaith ers y cyfarfod diwethaf a gynhaliwyd ar 2 Mawrth. Roedd agenda'r cyfarfod nesaf ar 24 Mehefin yn cael ei pharatoi a byddai'n cynnwys eitemau ar y canlynol: Lles, Iechyd a Diogelwch, gan gynnwys y gwaith dilynol ar Ddiogelwch Coedwigaeth; recriwtio a swyddi gwag; adolygiad o Adfywio a Sgwrs;

cynllunio ar gyfer olyniaeth a chynllunio'r gweithlu, gan gyfeirio at argymhellion yr archwiliad; dyfarniadau cyflog; archwiliad dwfn o lefelau absenoldeb. Byddai trafodaeth ar benodiadau FTA yn cael ei chynnwys yn yr adran ar niferoedd staff. Y gobaith oedd y byddai'r Pennaeth Datblygu Sefydliadol newydd yn ei swydd ac yn gallu ymuno â'r cyfarfod.

23. Rhoddodd Dr Rosie Plummer, Cadeirydd y Pwyllgor Ardaloedd Gwarchoddedig (PrAC), yr wybodaeth ddiweddaraf am y gwaith ers y cyfarfod a gynhaliwyd ar 1 Chwefror. Darparwyd diweddariad ar y Rhaglen Tirweddau Dynodedig Integredig mewn perthynas â'r parc cenedlaethol newydd posibl. Roedd gwaith cyn cychwyn wedi'i gwblhau, gan gynnwys cysylltu â'r awdurdodau lleol perthnasol, a chafwyd cadarnhad o'r cyllid gan Lywodraeth Cymru ar hyn. Gan fod y Bwrdd wedi cytuno'n flaenorol y dylai'r broses barhau, roedd PrAC bellach yn ystyried hyn ar ran y Bwrdd ar gyfer y parc cenedlaethol posibl. Y cam nesaf fyddai dechrau'r broses gyffredinol o ddynodi'r dirwedd, a fyddai'n symud i'r cam casglu tystiolaeth. Darparwyd diweddariad ar Safleoedd o Ddiddordeb Gwyddonol Arbennig (SoDdGA). Roedd tri SoDdGA newydd wedi'u cadarnhau heb unrhyw wrthwynebiadau. Byddai cyfarfod nesaf y PrAC yn canolbwyntio ar y Rhaglen Tirweddau Dynodedig Integredig, y targed '30erbyn30', perfformiad 2021 ar ddarparu a monitro safleoedd gwarchoddedig, y rhaglen Mawndiroedd a rhwydweithiau Ardaloedd Morol Gwarchoddedig.
24. Nodwyd y byddai'r papur Diweddariad Cyllid yn cael ei gyhoeddi a'i drafod yn y dyfodol fel rhan o'r cyfarfod cyhoeddus. Cytunwyd y byddai'r perfformiad cyllid ar gyfer diwedd y flwyddyn fel y'i nodwyd yn y sesiwn breifat yn cael ei gynnwys fel rhan o bapurau'r Bwrdd ym mis Gorffennaf.

CAM GWEITHREDU: Adroddiad Cyllid i'w gyhoeddi gyda phapurau cyhoeddus y Bwrdd ym mis Gorffennaf.

Eitem 6: Newidiadau arfaethedig i'r Cynllun Statudol a Chyfreithiol (SaLS)

Cyflwynwyr: Clare Jones, Cynghorydd Arbenigol Arweiniol, Llywodraethu; Victoria Painter, Rheolwr Llywodraethu a Risg

25. Rhoddodd y Cynghorydd Arbenigol Arweiniol, Llywodraethu, drosolwg byr o gynnwys y papur.
26. Bu'r Bwrdd yn ystyried y newidiadau arfaethedig i'r SaLS ar gyfer y Bwrdd Busnes Rheoleiddiol a derbyniwyd y newidiadau.

WEDI'I GYMERADWYO: Newidiadau i'r SaLS ar gyfer y Bwrdd Busnes Rheoleiddiol

Eitem 7: Strategaeth Goedwigaeth

Cyflwynwyr: Ruth Jenkins, Pennaeth Polisi Rheoli Adnoddau Naturiol; Miriam Jones-Walters, Cynghorydd Arbenigol, Stiwardiaeth Tir; Andrew Wright, Uwch Gynghorydd Arbenigol, Iechyd Planhigion a Throsglwyddo Gwybodaeth Ymchwil, Stiwardiaeth Tir; Dominic Driver, Pennaeth Stiwardiaeth Tir; Elsie Grace, Pennaeth Datblygu Masnachol Cynaliadwy

27. Fel cyd-noddwr yr eitem, rhoddodd y Cyfarwyddwr Gweithredol Cyfathrebu, Cwsmeriaid a Masnachol gyflwyniad ac amlinelliad byr o'r dull arfaethedig o ymdrin â'r trafodaethau.
28. Esboniodd y Pennaeth Stiwardiaeth Tir fod tair eitem i'w hystyried yng ngoleuni themâu cyffredinol integreiddio, pragmatiaeth a phendantwydd sensitif. Roedd angen dod o hyd i ateb pragmatig i ddyletswydd statudol CNC, felly cynigiwyd Pwyllgor Cynghori

Rhanbarthol (RAC) ar gyfer coedwigaeth. Roedd yr ymweliad safle ddoe wedi bod yn dda ac roedd y trafodaethau ynglŷn â'r dull pragmatig o blannu cydadferol wedi bod yn ddefnyddiol. Byddai'r camau nesaf sy'n deillio o'r drafodaeth strategol ym mis Mawrth yn cael eu hystyried, a byddai'r drafodaeth honno'n cael ei datblygu ymhellach, gan ganolbwyntio ar y Cytundeb Lefel Gwasanaeth (CLG) gyda Llywodraeth Cymru, cyn symud i mewn i'r Cynllun Corfforaethol ac, yn olaf, diben a rôl dogfen Ystâd Goed Llywodraeth Cymru. Yr amserlen ar gyfer y dull hwn fyddai tua dwy flynedd. Roedd y Prif Weithredwr a'r Cadeirydd wedi bod mewn trafodaethau ynglŷn â'r dull o lywodraethu er mwyn sicrhau bod gan y Bwrdd yr oruchwyliaeth a'r mewnbwn cywir.

29. Rhoddodd y Pennaeth Polisi Rheoli Adnoddau Naturiol drosolwg o'r papur a oedd yn cynnig sefydlu RAC coedwigaeth ac yn nodi'r gofynion cyfreithiol a statudol i CNC fod â RAC. Cynigiwyd y byddai'r pwyllgor hwn yn cael ei ychwanegu at Fforwm Rheoli Tir Cymru (WLMF) a'i sefydlu mewn ffordd a fyddai'n integreiddio â'r pwyllgor ac yn cynrychioli'r ystod o fuddiannau sydd wedi'u cynnwys yn y Ddeddf Coedwigaeth. Byddai hyn yn digwydd ledled Cymru ac yn adlewyrchu manteision economaidd rheoli mewn ffordd gynaliadwy. Esboniwyd mai un o'r rhesymau dros orfod mynd i'r afael â hyn nawr oedd bod Panel Cynghori Strategaeth Coetiroedd Llywodraeth Cymru yn cael ei ddiddymu a'i ddisodli gan strwythurau llywodraethu coedwigaeth newydd.
30. Trafododd aelodau'r Bwrdd y cynnig ar gyfer RAC coedwigaeth. Cytunwyd nad oedd yr enw 'Pwyllgor Cynghori Rhanbarthol' yn dangos y diben yn glir. Awgrymwyd y gallai 'Pwyllgor Cynghori Cymru' fod yn fwy priodol. Cadarnhaodd Pennaeth y Polisi Rheoli Adnoddau Naturiol y gallai fod gan y pwyllgor deitl gwaith gwahanol.
31. Byddai angen integreiddio Cylch Gorchwyl yr WLMF a'r RAC a sicrhau ei bod yn hawdd dod o hyd iddo ar y wefan. Argymhellwyd na ddylai hyn ychwanegu at faich yr ysgrifenyddiaeth ond y byddai angen ei gwmpasu'n effeithiol. Awgrymwyd y gallai fod angen denu pobl o dros y ffin er mwyn sicrhau diogelwch aelodaeth. Trafodwyd aelodaeth y pwyllgor. Byddai'n bwysig sicrhau cydbwysedd aelodaeth i gwmpasu'r ystod o fuddiannau.
32. Mynegodd aelodau'r Bwrdd bryderon bod strwythurau newydd yn cael eu sefydlu o dan Ddeddf Coedwigaeth 1967, na fyddai felly'n cynnwys ystyriaethau'n deillio o Ddeddf Llesiant Cenedlaethau'r Dyfodol na Deddf yr Amgylchedd. Argymhellwyd y dylai gael ei wirio i sicrhau nad oedd unrhyw wrthdaro â hyn a bod hyn yn cael ei gynrychioli. Nodwyd y byddai angen i Lywodraeth Cymru edrych ar y Ddeddf Goedwigaeth gyfan a'r ardal amaethyddol ehangach o fewn y tair i bum mlynedd nesaf ond, gan fod y rhaglen ddeddfwriaethol yn llawn iawn, roedd angen mabwysiadu ymagwedd bragmatig ar hyn o bryd.
33. Cadarnhaodd Zoe Henderson, Cadeirydd WLMF, ei chefnogaeth i'r cynnig ac argymhellodd y dylid rhoi gwybod i'r Bwrdd yn rheolaidd am diweddariadau yn unol â diweddariadau is-bwyllgorau eraill y Bwrdd.
34. Cytunodd y Bwrdd i ffurfio RAC coedwigaeth sy'n gysylltiedig ag WLMF, yn amodol ar eglurhad o'r aelodaeth a'r cylch gorchwyl, diweddariadau rheolaidd i'r Bwrdd ac enw diwygiedig.

CAM GWEITHREDU: Yr Ysgrifenyddiaeth i ychwanegu diweddariadau o WLMF at adran Diweddariadau Is-bwyllgorau'r Bwrdd ar agendâu'r Bwrdd.

WEDI’I GYMERADWYO: Ffurio RAC coedwigaeth sy'n gysylltiedig ag WLMF sy'n bodoli'n barod yn unol â gofynion y Ddeddf Coedwigaeth, yn amodol ar eglurhad o'r aelodaeth a'r cylch gorchwyl, diweddariadau rheolaidd i'r Bwrdd ac enw diwygiedig.

35. Rhoddodd y Cynghorydd Arbenigol, Stiwardiaeth Tir, drosolwg o'r gymeradwyaeth Adran 83 arfaethedig sydd i'w gymeradwyo gan y Bwrdd. Yn 2020, rhoddodd Llywodraeth Cymru gymeradwyaeth Adran 83 i CNC gaffael 350 hectar o dir ar gyfer plannu cydadferol yn lle coetiroedd a gollwyd yn barhaol i ddatblygiadau ynni adnewyddadwy. Roedd chwe safle wedi'u caffael, a dangoswyd y gallai CNC wneud y gwaith a chyflawni amrywiaeth o fuddion SMNR wrth weithio ac ymgysylltu â rhanddeiliaid. Roedd y gymeradwyaeth honno ar fin cael ei chwblhau ac amcangyfrifwyd y byddai 260 hectar yn cael ei golli yn y dyfodol agos, felly cynigiwyd y gymeradwyaeth Adran 83 arfaethedig er mwyn lliniaru'r golled hon. Tynnwyd sylw at y ffaith mai cyfran fach o'r tir a ddaeth i'r farchnad yng Nghymru oedd hon.
36. Diolchodd y Bwrdd i'r tîm am yr ymweliad â safle creu coetir Brownhill ddoe, a oedd yn ddefnyddiol ac yn llawn gwybodaeth.
37. Nododd aelodau'r Bwrdd rai o'r anawsterau a gododd o'r iaith a ddefnyddiwyd, a oedd yn awgrymu bod y dull yn cyfeirio at 'fwy o goed' yn unig. Awgrymwyd mai dull rheoli tir cyfan oedd hwn a gofynnwyd a ellid newid y naratif ar y set nesaf o gaffael tir i adlewyrchu hyn a phwysleisio'r gwaith ar dir i fynd i'r afael â'r gallu i wrthsefyll y newid yn yr hinsawdd, gwelliannau bioamrywiaeth a manteision hamdden. Fodd bynnag, byddai'n bwysig sicrhau nad oedd y diben yn mynd yn rhy eang ac yn cael ei wanedu.
38. Tynnwyd sylw at y ffaith bod llawer o uchelgais ar gyfer ardal fach a gofynnwyd a ddylid gwneud mwy. Cydnabuwyd bod cydbwysedd rhwng pryderon y cyhoedd a'r argyfwng natur ac, yn hytrach na newid yr iaith, byddai'n bwysig bod yn dryloyw, yn atebol a dangos bod pryderon wedi'u clywed a bod ymateb wedi'i ddarparu.
39. Gofynnwyd ynghylch y dull o ymdrin â'r tir ar ddiwedd y brydles. Cadarnhaodd y Pennaeth Datblygu Masnachol Cynaliadwy y byddai disgwyl i ddatblygwyr gael gwared ar y seilwaith ac adfer y tir. Fodd bynnag, roedd yn bosibl i ddatblygwyr geisio estyniadau i'w prydles a fyddai wedyn yn dod yn drafodaeth fasnachol.
40. Nododd y Bwrdd y pryderon a godwyd gan aelodau'r cyhoedd cyn y cyfarfod ar y math o dir a brynwyd ar gyfer creu coetir.
41. Codwyd pryderon gan aelodau'r Bwrdd ynghylch newid defnydd tir o ffermio i'r mathau hyn o gynlluniau plannu cydadferol. Pwysleisiwyd mai cydweithio â ffermwyr i ddatblygu cynlluniau ar ffermydd presennol fyddai'r ffordd orau ymlaen. Awgrymwyd na ddylid symud y tu hwnt i blannu cydadferol ond y dylid rhoi cefnogaeth i gymunedau gyflawni hyn, a fyddai felly'n helpu i ddiogelu'r Gymraeg a threftadaeth a diwylliant Cymru.
42. Trafododd aelodau'r Bwrdd y dull o ymdrin â defnydd tir a thynnwyd sylw at y ffaith y byddai angen datblygu gweledigaeth glir ar gyfer amrywio'r defnydd o dir ac y gallai hyn helpu i wella dealltwriaeth y cyhoedd. Trafodwyd y broses o wneud penderfyniadau ar y dull rheoli tir. Cydnabuwyd bod hyn yn rhan o ddarn ehangach yn hytrach na'r plannu cydadferol a oedd yn ganolbwynt i'r papur. Cydnabuwyd bod llywodraethu mewn perthynas â'r mater hwn yn gam nesaf pwysig ac y byddai'n cael ei ystyried fel rhan o adran nesaf yr eitem.
43. Cytunodd y Bwrdd i gymeradwyo'r cytundeb Adran 83 yn gofyn am brynu 260 hectar arall erbyn diwedd 2025/26 yn lle'r tir a gollwyd i weithgareddau ffermydd gwynt yn seiliedig ar

dir tebyg yn yr ardal leol lle bo hynny'n bosibl. Byddai trafodaethau yn parhau i ddatblygu llywodraethu ar y mater hwn.

PENDERFYNIAD: Cymeradwyo cytundeb Adran 83 yn gofyn am brynu 260 hectar arall erbyn diwedd 2025/26.

44. Rhoddodd yr Uwch Gyngorydd Arbenigol, Iechyd Planhigion a Throsglwyddo Gwybodaeth Ymchwil, Stiwardiaeth Tir, drosolwg o'r papur a ddilynodd y drafodaeth strategol yng nghyfarfod y Bwrdd ym mis Mawrth ar Ystâd Goed Llywodraeth Cymru. Roedd y materion a godwyd yn cynnwys newidiadau mewn pwysau amgylcheddol, a goruchwyllo a llywodraethu. Roedd dull aml-flwyddyn yn cael ei ddatblygu a fyddai'n cynnwys CLG newydd a gomisiynwyd gan Lywodraeth Cymru mewn perthynas ag Ystâd Goed Llywodraeth Cymru. Byddai cwrpas y CLG yn aml-flwyddyn, gan gwmpasu cyfnod y Senedd, ac yn ddeinamig ac yn hyblyg, gan gynnwys adolygiad blynyddol. Y bwriad oedd ehangu'r CLG i gynnwys Ystâd CNC yn ei chyfanrwydd a chynnwys cyswllt â gweithgareddau masnachol ac incwm pren. Byddai angen cyfres o ddangosyddion i adolygu'r tueddiadau, a gellid ystyried gwreiddio'r dull plannu cydadferol hefyd. Ni fyddai capasiti i gynnal yr adolygiad cyfan ar yr un pryd, felly cynigiwyd y dylid canolbwyntio ar y CLG i sefydlu'r cyllid a chyflawni ymrwymiad cyllidebol hirdymor, gydag opsiynau ar gyfer cynnwys y gwasanaeth yn hyn o beth. Byddai hyn wedyn yn bwydo i mewn i'r Cynllun Corfforaethol newydd, ac yna'r ddogfen Diben a Rôl yn 2023-24.
45. Ystyriodd aelodau'r Bwrdd gynnwys yr adroddiad. Mynegwyd pryderon ynghylch y pwysau ar yr amserlen ar gyfer y CLG a'r materion yn ymwneud â gorchudd coed a drafodwyd. Byddai manteision o edrych yn gyfannol ar orchudd tir a Gwarchodfeydd Natur Cenedlaethol (NNRs) ond roedd pryderon y gallai'r CLG arwain at glymu materion cyn mynd i'r afael â'r materion hyn. Roedd pryderon hefyd ynghylch cytuno ar CLG cyn y Cynllun Corfforaethol newydd, a oedd â'r potensial i fod yn drawsnewidiol. Roedd perygl na fyddai'r CLG yn cyflawni mewn perthynas â'r argyfyngau hinsawdd a natur.
46. Cadarnhaodd y Cadeirydd a'r Prif Weithredwr fod trafodaethau wedi'u cynnal ar greu is-bwyllgor Bwrdd a fyddai'n ystyried yr holl dir a reolir gan CNC, gan gynnwys Gwarchodfeydd Natur Cenedlaethol. Byddai'n bwysig ystyried a sefydlu'r aelodaeth a dechrau symud ymlaen ar hyn. Byddai angen bod yn bragmatig o ran datblygu'r CLG, a oedd yn rhan bwysig o'r trafodaethau Sylfaenol gyda Llywodraeth Cymru ac eitem o ffocws gwleidyddol.
47. Roedd y Bwrdd yn cefnogi'r cynnig i ddatblygu is-bwyllgor Bwrdd newydd ac yn cydnabod ei bwysigrwydd o ran gwneud rhywfaint o'r gwaith caled yn y dull o ymdrin â defnydd tir. Byddai'n bwysig meddwl am bethau'n wahanol a mabwysiadu dull pendant o fynd i'r afael â'r argyfyngau hinsawdd a natur wrth weithio i gefnogi cymunedau mewn modd cydweithredol a phositif. Cytunwyd y dylai'r gwaith ar y CLG barhau.

CAM GWEITHREDU: Y Cadeirydd a'r Prif Weithredwr i ddatblygu'r trefniadau llywodraethu o ran y dull o ymdrin â thir a reolir gan CNC ar is-bwyllgor newydd y Bwrdd.

Eitem 8: Trafodaeth Strategol ar Reoli Perygl Llifogydd

Cyflwynydd: Jeremy Parr, Pennaeth Rheoli Perygl Llifogydd a Digwyddiadau

48. Cyflwynodd Cyfarwyddwr Gweithredol Tystiolaeth, Polisi a Thrwyddedu (EPP) yr eitem a oedd wedi dwyn ynghyd y themâu a ddeilliodd o'r drafodaeth strategol yn yr FRMC. Byddai trafodaethau manylach yn dilyn yn yr FRMC ond roedd hwn yn bwynt allweddol gyda'r Cynllun Corfforaethol sy'n datblygu, trafodaethau CLG ac edrych ar strategaethau

a pholisïau gyda Llywodraeth Cymru. Byddai cynrychiolwyr Llywodraeth Cymru yn ymuno â chyfarfod nesaf yr FRMC i barhau â'r trafodaethau.

49. Croesawodd Julia Cherrett, a oedd yn dirprwyo ar ran Cadeirydd yr FRMC, ychwanegu aelodau newydd i'r FRMC a'r her yr oeddent wedi'i chyflwyno i archwilio syniadau newydd. Roedd y drafodaeth strategol yng nghyfarfod diweddar yr FRMC wedi dod i'r casgliad nad oedd atebion hawdd a bod llawer i'w archwilio o hyd, gan gynnwys gwaith partneriaeth.
50. Rhoddodd y Pennaeth Rheoli Perygl Llifogydd a Digwyddiadau gyflwyniad i osod y cyd-destun ar gyfer y drafodaeth. Rhannwyd nifer yr eiddo a oedd mewn perygl o lifogydd yng Nghymru ac roedd hyn yn debygol o gynyddu 34% erbyn 2120. Roedd disgwyl i hyn gynnwys cynnydd mawr oherwydd llifogydd arfordirol. Gosodwyd y cyd-destun o fewn yr argyfyngau hinsawdd a natur a chyflawni mewn perthynas â'r rhain. Roedd yn bwysig nodi nad oedd un ateb unigol i lifogydd. Byddai angen canolbwyntio ar yr agenda integredig ar gyfer cynllunio dalgylchoedd a gwydnwch cymunedol. Rhannwyd enghreifftiau o ymyriadau Rheoli Llifogydd yn Naturiol a thynnwyd sylw at y ffaith y gellid gweld y mapiau sy'n dangos hyn ar wefan CNC. Byddai'r drafodaeth hon yn canolbwyntio ar y continwmm, a'r hyn y gellid ei wneud wrth symud ymlaen, yn enwedig pe bai mwy o arian gan Lywodraeth Cymru ar gael.
51. Trafododd aelodau'r Bwrdd yr eitem ac ystyriodd yr opsiynau a gyflwynwyd yn y papur. Gyda'r cyllid ychwanegol, nodwyd y gallai fod lle i wneud mwy ar wydnwch. Roedd cyfle pwysig gyda'r Cynllun Corfforaethol newydd i feddwl yn wahanol ac ystyried beth ddylai lefel yr uchelgais fod. Am resymau deddfwriaethol ac ymarferol, cydnabuwyd y dylai'r gwaith a oedd yn cael ei wneud barhau, ond roedd hefyd yn bwysig ystyried yr hyn y gellid ei wella neu ei wneud yn wahanol. Roedd cyfle i ddatblygu sylfaen dystiolaeth dda a phrawf o gysyniad ar gyfer y gwaith wrth symud ymlaen a cheisio creu newid trawsnewidiol.
52. Nododd aelodau'r FRMC ei bod yn heriol i'r pwyllgor ddylanwadu ar y rhaglen waith sydd ar y gweill ac adrodd ar y broses o wneud penderfyniadau. Trafodwyd hyn yn fanwl yng nghyfarfod diwethaf yr FRMC ac roedd gwaith yn mynd rhagddo ar y mater hwn.
53. Yn dilyn yr adroddiadau o lifogydd Storm Dennis, awgrymwyd y dylid parhau i ddatblygu momentwm cyfathrebu â'r cyhoedd yng Nghymru a'i ddatblygu ymhellach. Gallai'r cyfleoedd i agor y sgysiau ddilyn y gwaith ar ddalgylch Taf, a nodwyd fel enghraifft fyw a heriol. Byddai'r adolygiad gan yr Athro Elwen Evans o'r Adroddiadau Adran 19 ac Adolygiad Llifogydd CNC a'r adolygiad o seilwaith llifogydd gan y Comisiynydd Seilwaith hefyd yn helpu i lywio'r trafodaethau o fewn CNC a chydag eraill.
54. Tynnwyd sylw at y ffaith bod manteision posibl o Gynlluniau Rheoli Llifogydd yn Naturiol ar gyfer ymdrin â materion ansawdd dŵr, yn ogystal â maint. Byddai hyn yn cynnwys cymysgedd o ddefnyddiau tir, felly byddai angen ystyried y cymhellion a'r ysgogiadau. Trafodwyd pwysigrwydd gweithio gyda phartneriaid i sicrhau dull integredig o ymdrin ag ansawdd dŵr a maint. Cydnabuwyd bod y rhain yn faterion anodd ac emosiynol, a bod angen cynnal sgysiau anodd. Roedd gwaith yn cael ei wneud drwy CLILC ynghylch sgysiau ar ymaddasu.
55. Trafodwyd yr opsiynau yn y papur. Awgrymwyd mai opsiwn rywle rhwng c) a d) fyddai'r ffordd ymlaen gan y byddai'n bwysig parhau â'r gwaith wrth adolygu dewisiadau amgen a gweithio mewn ffordd integredig yn hytrach na defnyddio dull seilo. Byddai angen ystyried gwerth am arian a sut beth fyddai hynny. Byddai angen i sgysiau barhau gyda

Llywodraeth Cymru. Byddai angen ymagwedd bragmatig a gallai fod angen cydnabod na fyddai'n bosibl parhau â phopeth a oedd wedi'i wneud o'r blaen.

56. Archwiliwyd dulliau posibl o ymdrin â'r materion. Awgrymwyd y byddai rheoliadau adeiladu a chynllunio cryfach yn bwysig, yn enwedig ar ddatblygiadau mewn ardaloedd sy'n agored i lifogydd. Fodd bynnag, nodwyd yr heriau presennol sy'n gysylltiedig â Nodyn Cyngor Technegol 15 (TAN15). Gellid ystyried arloesi ac enghreifftiau o arferion gorau ar lefel genedlaethol a rhyngwladol. Roedd potensial i gyfathrebu ynghylch y Cynllun Corfforaethol newydd, Coedwigaeth a Llifogydd gael eu datblygu fel un sgwrs fawr yng Nghymru ar y themâu hyn. Nodwyd heriau o ran adnoddau, a'r ffaith y byddai angen blaenoriaethu.
57. Gellid datblygu fframwaith ar gyfer sgwrs genedlaethol, gyda chomisiwn yn cael ei sefydlu i alluogi hyn i ddigwydd ledled Cymru. Byddai rôl oruchwylio strategol CNC yn bwysig o ran rhoi cyngor i Lywodraeth Cymru wrth bwysleisio'r angen am sgwrs genedlaethol. Byddai'n bwysig cynnwys y ffigurau i'w hystyried gan y cyhoedd a gofynion a senarios buddsoddi hirdymor. Byddai hefyd angen ystyried yr offer presennol ar gyfer democratiaeth a gwneud penderfyniadau a oedd yn cynnwys sylfaen dystiolaeth a gyflwynwyd mewn ffordd hygyrch i hwyluso trafodaeth am werthoedd a blaenoriaethau.
58. Diolchwyd i'r tîm Rheoli Perygl Llifogydd.

Eitem 9: Adroddiad Blynyddol Lles, Iechyd a Diogelwch 2021-22

Cyflwynydd: Charlotte Morgan, Rheolwr Lles, Iechyd a Diogelwch

59. Cyflwynodd y Cyfarwyddwr Gweithredol Strategaeth a Datblygiad Corfforaethol Adroddiad Blynyddol Lles, Iechyd a Diogelwch 2021-22. Roedd yr Adroddiad Blynyddol yn dangos y cynnydd a wnaed mewn amryw o feysydd, gan gynnwys sicrhau achrediad ISO 45001, i gefnogi'r agenda Lles, Iechyd a Diogelwch, gan gynnwys sicrhau bod uwch arweinwyr strategol ar draws y sefydliad. Roedd yr arweinyddiaeth strategol hon yn cynnwys ymgysylltu â'r Bwrdd ar Les, Iechyd a Diogelwch, megis y drafodaeth ddiweddar ar ddiogelwch coedwigaeth ac ymgysylltu â buddiannau sectoraidd ehangach. Y nod oedd parhau â'r ffocws hwnnw dros y flwyddyn i ddod.
60. Tynnodd y Rheolwr Lles, Iechyd a Diogelwch sylw at feysydd allweddol yn yr adroddiad. Roedd agwedd gadarnhaol a phroffesiynoldeb y tîm wedi helpu i gyflawni'r cofrestrriad ISO 45001 i reoli safon iechyd a diogelwch galwedigaethol. Bu cynnydd yn nifer yr achosion o gofnodi digwyddiadau yn dilyn codi cyfyngiadau Covid a chynnydd cadarnhaol yn nifer yr adroddiadau o ddamweiniau fu bron â digwydd. Roedd perthynas waith a phartneriaeth gydweithredol gadarnhaol wedi'u sefydlu gyda'r Awdurdod Gweithredol Iechyd a Diogelwch (HSE) a'r Comisiwn Coedwigaeth.
61. Ystyriodd aelodau'r Bwrdd gynnwys yr adroddiad. Awgrymwyd y dylid cynnwys rôl yr hyrwyddwyr iechyd meddwl, ynghyd â gwybodaeth am eu heffaith. Cadarnhaodd y Rheolwr Lles, Iechyd a Diogelwch fod dros 90 o hyrwyddwyr iechyd meddwl staff yn cyfarfod yn fisol a bod mentrau wedi'u rhoi ar waith yn dilyn cynnwys y trafodaethau hyn.
62. Croesawyd y gwelliannau o ran adroddiadau ar ddigwyddiadau a damweiniau fu bron â digwydd. Cydnabuwyd rôl y porth ar-lein AssessNET wrth gasglu tueddiadau data a'r gwersi a ddysgwyd o adroddiadau ar ddigwyddiadau a damweiniau fu bron â digwydd. Roedd adroddiad monitro gweithredol ar y rhain wedi'i gynnwys yn yr wybodaeth a gynhyrchwyd. Byddai hyn yn cael ei drafod yn y Fforymau Lles, Iechyd a Diogelwch nesaf a byddai dadansoddiad yn cael ei ystyried yng nghyfarfod nesaf y PaRC.

63. Trafodwyd y digwyddiadau difrifol yn ymwneud â contractwyr. Gofynnwyd a oedd y prosesau caffael yn ddigonol i sicrhau cymhwysedd contractwyr. Cadarnhaodd y Rheolwr Lles, Iechyd a Diogelwch fod gweithdrefn a pholisi ar waith i sicrhau bod rhaid i bob contractwr basio asesiad holiadur cyn-gymhwyso Lles, Iechyd a Diogelwch a oedd yn cynnwys asesu'r gwaith o fonitro eu his-gontractwyr. Cadarnhawyd bod cymorth ac arweiniad yn cael eu cynnig i gontractwyr yn ôl yr angen, ond na fyddent yn cael eu cynnwys ar y fframwaith pe baent yn methu'r asesiad.
64. Trafodwyd pwysigrwydd Lles, Iechyd a Diogelwch y cyhoedd i Ystâd CNC, yn enwedig mewn perthynas â beicio mynydd. Cadarnhaodd y Rheolwr Lles, Iechyd a Diogelwch fod CNC yn rhan o Arena Asesu Risg Diogelwch y Cyhoedd a oedd yn edrych ar egwyddorion y Grŵp Diogelwch Ymwelwyr a bod proses ar waith i sicrhau bod arwyddion diogelwch y cyhoedd yn cael eu hasesu'n briodol.
65. Gofynnwyd a ellid cynnwys y gwelliannau lles a'r effaith gadarnhaol a gynigir gan Ystâd CNC yn yr Adroddiad Lles, Iechyd a Diogelwch, yn ogystal â'r materion ffisiolegol. Cadarnhawyd bod amryw o astudiaethau wedi'u cynnal ar fanteision lles yr Ystâd a byddai'n bwysig cynnwys y rhain mewn adroddiadau yn y dyfodol.

CAM GWEITHREDU: Y Rheolwr Lles, Iechyd a Diogelwch i ychwanegu gwybodaeth am effaith Ystâd CNC ar les i'r rhestr o eitemau i'w cynnwys ar Adroddiadau Lles, Iechyd a Diogelwch yn y dyfodol.

66. Trafodwyd yr arolwg staff. Byddai hyn yn cael ei anfon at y staff yn yr hydref. Nodwyd y gallai fod yn anodd cymharu'r canlyniadau ar gyfer ymatebion cyn ac ar ôl y pandemig oherwydd newid yn y dull o ymdrin â'r arolwg.
67. Cymeradwyodd y Bwrdd Adroddiad Blynyddol Lles, Iechyd a Diogelwch 2021-22 a diolchwyd i'r Rheolwr Lles, Iechyd a Diogelwch a'i thîm.

WEDI'I GYMERADWYO: Adroddiad Blynyddol Lles, Iechyd a Diogelwch 2021-22

Eitem 10. Rhagolwg y Bwrdd

Cyflwynydd: Natalie Williams, Arweinydd Tîm, Ysgrifenyddiaeth y Bwrdd

68. Nodwyd y Rhagolwg ar gyfer y cyfarfod ym mis Gorffennaf. Cynigiwyd y byddai'r cyfarfod yn cael ei gynnal dros un diwrnod. Yna byddai sesiwn ar wahân ar y Cynllun Corfforaethol.

Eitem 11: UNRHYW FATER ARALL

69. Diolchodd y Cadeirydd i bawb a gymerodd ran yn yr ymweliad safle amser cinio, oedd yn llawn gwybodaeth.
70. Dywedodd y Cadeirydd wrth y Bwrdd fod yr Athro Calvin Jones wedi cytuno i gadeirio is-bwyllgor newydd y Bwrdd ar y dull o ymdrin â defnydd tir.
71. Cytunwyd ar y newidiadau i'r SaLS ar gyfer Bwrdd Busnes y Gwasanaethau Corfforaethol drwy ohebiaeth.

WEDI'I GYMERADWYO: Newidiadau i'r SaLS ar gyfer Bwrdd Busnes y Gwasanaethau Corfforaethol

72. Cymeradwyodd y Bwrdd Ddatganiad Caethwasiaeth Fodern CNC 2022-23.

WEDI'I GYMERADWYO: Datganiad Caethwasiaeth Fodern CNC 2022-23

- Daeth cyfarfod y Bwrdd i ben -

Eitem 12. Sesiwn holi ac ateb gyhoeddus

73. Croesawodd y Cadeirydd aelodau'r cyhoedd ac esboniodd sut fyddai'r sesiwn yn cael ei chynnal. Gwahoddodd y Cadeirydd gwestiynau gan y cyhoedd.

74. Gofynnodd aelodau'r cyhoedd gwestiynau i'r Bwrdd a darparwyd ymatebion.

- Daeth y Cyfarfod Cyhoeddus i ben -